



Comhairle an
Aontais Eorpaigh

An Bhruiséil, 8 Feabhra 2024
(OR. en)

6374/24

Comhad Idirinstitiúideach:
2024/0010(NLE)

ACP 20
WTO 18
RELEX 173
COASI 19

TOGRA

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	24 Eanáir 2024
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2024) 20 final
Ábhar:	Togra le haghaidh CINNEADH ÓN gCOMHAIRLE maidir le haontachas Niue leis an gComhaontú Comhpháirtíochta Eatramhach idir an Comhphobal Eorpach, de pháirt, agus na Stáit san Aigéan Ciúin, den pháirt eile

Gheobhaidh na toscaireachtaí i gceangal leis seo doiciméad COM(2024) 20 final.

Faoi iamh: COM(2024) 20 final



AN COIMISIÚN
EORPACH

An Bhruiséil, 24.1.2024
COM(2024) 20 final

2024/0010 (NLE)

Togra le haghaidh

CINNEADH ÓN gCOMHAIRLE

**maidir le haontachas Niue leis an gComhaontú Comhpháirtíochta Eatramhach idir an
Comhphobal Eorpach, de pháirt, agus na Stáit san Aigéan Ciúin, den pháirt eile**

MEABHRÁN MÍNIÚCHÁIN

1. COMHTHÉACS AN TOGRA

• Forais agus cuspóirí an togra

Is é atá sa togra le haghaidh Cinneadh ón gComhairle a ghabhann leis seo, an ionstraim dlí i ndáil le haontachas Niue leis an gComhaontú Comhpháirtíochta eatramhach idir an tAontas Eorpach, de pháirt, agus na Stáit san Aigéan Ciúin, den pháirt eile, a fhormheas, thar ceann an Aontais Eorpaigh (AE), de bhun Airteagal 218(6) CFAE.

D'údaraigh an Chomhairle an Coimisiún le tús a chur le caibidlíocht i leith Comhaontuithe Comhpháirtíochta Eacnamaíche (CCEnna) le tíortha san Afraic, i Muir Chairib agus san Aigéan Ciúin (tíortha ACC) an 12 Meitheamh 2002.

Shínigh an tAontas CCE eatramhach an 30 Iúil 2009 idir an tAontas (an Comhphobal Eorpach ag an am), de pháirt, agus na Stáit san Aigéan Ciúin, den pháirt eile. Tá CCE eatramhach curtha i bhfeidhm go sealadach ag Nua- Ghuine Phapua agus ag Poblacht Fhidsí ó bhí an 20 Nollaig 2009 agus an 28 Iúil 2014 ann, faoi seach.

Le hAirteagal 80 den Chomhaontú Comhpháirtíochta Eacnamaíche eatramhach, déantar foráil maidir leis an bhfeidearthacht go n- aontódh Oileánstáit eile san Aigéan Ciúin don Chomhaontú. Dá réir sin, d'aontaigh Stát Neamhspleách Shamó agus Oileáin Sholomón don Chomhaontú agus tá sé á chur i bhfeidhm acu go sealadach ó bhí an 31 Nollaig 2018 agus an 17 Bealtaine 2020 ann, faoi seach.

Chuir Niue iarraidh faoi bhráid an Choimisiúin an 26 Bealtaine 2023, in éineacht le tairiscint rochtana ar an margadh, chun aontú do CCE eatramhach. Tá measúnú déanta ag an gCoimisiún ar an tairiscint agus chinn sé go bhfuil sí inghlactha. Dá réir sin, chuir sé an chaibidlíocht i gcrích thar ceann an Aontais.

• Comhsheasmhacht le forálacha beartais atá sa réimse beartais cheana

Leis an togra seo, cuirtear chun feidhme an Comhaontú Comhpháirtíochta idir comhaltaí an Ghrúpa Stát san Afraic, i Muir Chairib agus san Aigéan Ciúin, de pháirt, agus an Comhphobal Eorpach agus a Bhallstáit, den pháirt eile ('Comhaontú Comhpháirtíochta ACC- AE', nó Comhaontú Cotonou, a bhfuil 'Comhaontú AE- ESACC' (Comhaontú iar- Cotonou) le cur ina ionad)¹.

Le haontachas Niue leis an gComhaontú Comhpháirtíochta Eacnamaíche eatramhach idir an tAontas, Fidsí, Nua- Ghuine Phapua, Samó agus Oileáin Sholomón², ar comhaontú trádála neamhshiméadrach é atá comhoiriúnach le EDT, déantar creat dlíthiúil chaidreamh trádála an Aontais le tíortha comhpháirtíochta a threisiú agus an trádáil chómhalartach a éascú. Déanann sé Niue a chuimsiú freisin sa chóras comhrialacha agus comhinstiúidí a bhunaítear le CCE eatramhach.

Baineann Niue tairbhe as socrú caighdeánach maidir le Córas Ginearálta um Fhabhair ('GSP') lena ndeonaítear díothú nó laghdú dleachta dó le haghaidh thart ar 66 % de línte taraife uile an Aontais. Chun tairbhiú de rochtain saor ó dhleacht agus saor ó chuótaí ar mhargadh an Aontais agus de dheiseanna níos leithne an Chomhaontaithe, bheadh ar Niue aontú do CCE

¹ Comhaontú arna leasú leis an gComhaontú a síníodh i Lucsamburg an 25 Meitheamh 2005 (IO L 209, 11.8.2005, lch. 27) agus leis an gComhaontú a síníodh in Ouagadougou an 22 Meitheamh 2010 (IO L 287, 4.11.2010, lch. 3).

² Cinneadh ón gComhairle an 13 Iúil 2009 maidir le síniú agus cur i bhfeidhm sealadach an Chomhaontaithe Comhpháirtíochta Eatramhaigh idir an Comhphobal Eorpach, de pháirt, agus na Stáit san Aigéan Ciúin, den pháirt eile (IO L 272, 16.10.2009, lch. 1).

eatramhach idir an tAontas agus na Stáit san Aigéan Ciúin (Fidsí, Nua- Ghuine Phapua, Samó agus Oileáin Sholomón).

Ar aontachas, agus go dtí go mbeidh na nósanna imeachta inmheánacha gaolmhara curtha i gcrích ag na Stáit san Aigéan Ciúin is páirtithe sa Chomhaontú (Fidsí, Nua- Ghuine Phapua, Samó agus Oileáin Sholomón), cuirfidh an tAontas agus Niue an Comhaontú i bhfeidhm go sealadach faoi réir fógra a thabhairt dá chéile i scríbhinn faoi chur i gcrích na nósanna imeachta is gá chun na críche sin i gcomhréir le hAirteagal 76(3) den Chomhaontú.

- **Comhsheasmhacht le beartais eile de chuid an Aontais**

Tá forálacha sa Chomhaontú Comhpháirtíochta Eacnamaíche freisin maidir le forbairt inbhuanaithe (Airteagal 3) lena n- athdhearbhaíonn na Páirtithe go mbeidh cuspóir na forbartha inbhuanaithe ina chuid dhílis d'fhorálacha an Chomhaontaithe, i gcomhréir leis na cuspóirí agus prionsabail uileghabhálacha a leagtar amach i gComhaontú Cotonou, go háirithe an gealltanais ginearálta chun an bhochtaineacht a laghdú agus a dhíothú ar deireadh ar bhealach atá comhsheasmhach le cuspóirí na forbartha inbhuanaithe.

Tá CCE eatramhach ina chomhaontú trádála atá dírithe ar an bhforbairt, lena dtugtar rochtain neamhshiméadrach ar an margadh do Niue agus lena gceadaítear dó earnálacha íogaire a chosaint ar an léirscaoileadh, agus líon mór coimircí agus clásal á soláthar san am céanna i ndáil le naithionscal a chosaint. Tá forálacha ann thairis sin maidir leis na rialacha tionscnaimh a éascaíonn onnmhairí Niue isteach san Aontas. Cuireann na forálacha seo le cuspóir an Chomhtháthaithe Beartas ar mhaithe le Forbairt agus tá siad comhsheasmhach le hAirteagal 208(2) CFAE.

2. BUNÚS DLÍ, COIMHDEACHT AGUS COMHRÉIREACHT

- **Bunús dlí**

Is é bunús dlí an Chinnidh seo ón gComhairle an Conradh ar Fheidhmiú an Aontais Eorpaigh, go háirithe an chéad fhomhír d'Airteagal 207(4), i gcomhar le hAirteagal 218(6)(a)(v) de.

- **Coimhdeacht (i gcás inniúlacht neamheisiach)**

Sainmhínítear an comhbheartas tráchtála, i gcomhréir le hAirteagal 3 den CFAE, mar inniúlacht eisiach de chuid an Aontais.

- **Comhréireacht**

Tá gá leis an togra seo chun gealltanais idirnáisiúnta an Aontais a chur chun feidhme, mar a leagtar amach i gComhaontú Comhpháirtíochta ACC- AE, go háirithe chun socruithe trádála nua atá comhoiriúnach do rialacha EDT a thabhairt i gcrích, socruithe a dhéanann bacainní ar thrádáil idir na Páirtithe a bhaint de réir a chéile agus comhar i ngach réimse a bhaineann le trádáil leis na Stáit san Aigéan Ciúin a fheabhsú.

- **An rogha ionstraime**

Níl aon ionstraim dlí eile ann a d'fhéadfaí a úsáid chun an cuspóir a chuirtear in iúl sa togra seo a bhaint amach.

3. TORTHAÍ AR MHEASTÓIREACHTAÍ EX POST, AR CHOMHAIRLIÚCHÁIN LEIS NA PÁIRTITHE LEASMHARA AGUS AR MHEASÚNUITHE TIONCHAIR

- **Meastóireachtaí ex post/seiceálacha oiriúnachta ar an reachtaíocht atá ann cheana**

Neamhbhainteach.

- **Measúnú tionchair**

Rinneadh Measúnú Tionchair Inbhuanaitheachta (SIA) ar Chomhaontuithe Comhpháirtíochta Eacnamaíche ACC- AE idir 2003 agus 2007. D'fhoilsigh an Coimisiún Eorpach na téarmaí tagartha le haghaidh an tionscadail sin in 2002 mar chuid de ghlaio iomaíoch ar thairiscintí. Mar thoradh ar an nglao sin ar thairiscintí, bronnadh creachtchonaradh 5 bliana ar PwC France i mí Lúnasa 2002. Cuireadh dréachtleagan de thuarascáil chríochnaitheach SIA i láthair páirtithe leasmhara san Eoraip le linn an chruinnithe maidir le Comhphlé an Aontais leis an tSochaí Shibhialta a d'eagraigh an Coimisiún Eorpach an 23 Márta 2007 i mBriséil na Beilge. Ní dhearnadh aon SIA nua toisc go mbaineann an tionscnamh seo le haontachas le Comhaontú atá ann cheana agus atá á chur i bhfeidhm cheana ag na hOileánstáit eile san Aigéan Ciúin a bhfuil a saintréithe struchtúracha agus a staid eacnamaíoch agus shóisialta comhchosúil leo siúd atá ag Niue.

- **Oiriúnacht rialála agus simpliú**

Níl an formheas ar aontachas Niue le CCE eatramhach faoi réir nósanna imeachta an chláir um Oiriúnacht agus Feidhmíocht Rialála (REFIT); ní thiocfaidh aon chostas ar FBManna an Aontais dá bharr; agus ní chruthaítear aon fhadhb leis ó thaobh na timpeallachta digítí de.

- **Ceartha bunúsacha**

Níl aon iarmhairtí ag gabháil leis an togra seo maidir le cosaint na gceart bunúsach san Aontas.

4. IMPLEACHTAÍ BUISÉADACHA

Tairbheoidh Niue de rochtain iomlán saor ó dhleacht agus saor ó chuótaí ar mhargadh an Aontais do gach táirge, mar mhalairt ar a mhargadh do tháirgí an Aontais a oscailt de réir a chéile. Ní bheidh aon impleacht bhuiséadach ann toisc go bhfágfaidh aontachas Niue leis an gComhaontú go leanfar den chuid is mó leis an rochtain atá aige ar mhargadh an Aontais (faoi GSP caighdeánach) ar na téarmaí tosaíochta céanna.

5. EILIMINTÍ EILE

- **Tairbhí an aontachais d'oibreoirí eacnamaíocha**

Le CCE eatramhach, bunaítear na dálaí chun go bhféadfaidh oibreoirí eacnamaíocha an Aontais leas iomlán a bhaint as na deiseanna idir na geilleagair faoi seach. I gcaitheamh a chur chun feidhme, is éard a dhéanfaidh CCE eatramhach onnmhaireoirí an Aontais a scaoileadh ó dhleachtanna custaim a íoc, den chuid is mó, ar tháirgí tionsclaíocha chuig Niue. Comhlíonann sé na critéir a leagtar síos in Airteagal XXIV de Chomhaontú Ginearálta 1994 um Tharaifí agus Trádáil (GATT 1994) (chun deireadh a chur le dleachtanna agus rialacháin tráchtála shriantacha eile i ndáil le formhór mór na trádála idir na páirtithe). Tá an tairiscint laistigh de raon thairseach EDT, i.e. 78.9 % den léirscaoileadh (i línte taraife), a chomhfhreagraíonn do 81 % den mhéid onnmhairí ón Aontas i gcaitheamh 20 bliain.

Tairbheoidh Niue dá rochtain saor ó dhleacht agus saor ó chuótaí ar mhargadh an Aontais a choinneáil ar bun.

Le CCE eatramhach, bunaítear tacar disciplíní freisin i réimsí na forbartha inbhuanaithe; Bacainní Teicniúla ar an Trádáil (TBT); agus na mbeart sláintíochta agus fiteashláintíochta (SPS) i measc réimsí eile. Thairis sin, tá na Páirtithe sa Chomhaontú Comhpháirtíochta Eacnamaíche eatramhach rannpháirteach sa Choiste um Thrádáil a bhunaítear faoin gComhaontú. Mar gheall ar an bhféidearthacht go mbainfidh an tAontas leas as an sásra déthaobhach um réiteach díospóidí dá bhforáiltear faoin gComhaontú, cuirtear leis an gcuspóir go ndéanfar timpeallacht thrédhearcach, neamh- idirdhealaitheach agus intuartha a áirithiú d'oibreoirí de chuid an Aontais sna tíortha san Aigéan Ciúin.

Pleananna cur chun feidhme, agus socruithe faireacháin, meastóireachta agus tuairiscithe

Beidh Niue rannpháirteach sa Choiste um Thrádáil, a bhunaítear i gcomhréir le hAirteagal 68 de CCE eatramhach, a phléifidh le gach ábhar is gá chun an Comhaontú a chur chun feidhme, lena n- áirítear faireachán agus athbhreithniú a dhéanamh ar an gcur chun feidhme, comhordú agus comhairliúchán a sholáthar maidir le saincheisteanna a bhaineann le bacainní teicniúla ar thrádáil (BTT) agus bearta sláintíochta agus fiteashláintíochta (SPS), earnálacha agus táirgí tosaíochta agus na réimsí tosaíochta um chomhar a eascraíonn astu a shainathint agus a athbhreithniú, agus moltaí a dhéanamh i dtaobh modhnuithe ar an gComhaontú. Ionadaithe ó na Páirtithe a bheidh sa Choiste um Thrádáil.

• Doiciméid mhíniúcháin (i gcás treoracha)

Neamhbhainteach.

• Míniúchán mionsonraithe ar fhorálacha sonracha an togra

In Airteagail 1 agus 2 den togra tá forálacha maidir le haontachas Niue leis an gComhaontú Comhpháirtíochta Eacnamaíche eatramhach a fhorghnó, thar ceann an Aontais, agus maidir le fógraí chun toiliú an Aontais Eorpaigh le haontachas an Chomhaontaithe agus lena chur i bhfeidhm sealadach a chur in iúl, i gcomhréir le hAirteagal 76(3) de.

Sonraítear le hAirteagal 3 nár cheart formheas an aontachais a fhorléiriú mar ní lena dtugtar cearta nó a lena bhforchuirtear oibleagáidí is féidir a agairt go díreach os comhair chúirteanna nó bhinsí an Aontais nó na mBallstát.

Le hAirteagal 4, leagtar síos dáta theacht i bhfeidhm an Chinnidh.

2024/0010 (NLE)

Togra le haghaidh

CINNEADH ÓN gCOMHAIRLE

maidir le haontachas Niue leis an gComhaontú Comhpháirtíochta Eatramhach idir an Comhphobal Eorpach, de pháirt, agus na Stáit san Aigéan Ciúin, den pháirt eile

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe an chéad fhomhír d’Airteagal 207(4), i gcomhar le pointe (a)(v) den dara fhomhír d’Airteagal 218(6) de,

Ag féachaint don togra ón gCoimisiún Eorpach,

Ag féachaint don toiliú ó Pharlaimint na hEorpa¹,

De bharr an mhéid seo a leanas:

- (1) An 12 Meitheamh 2002, d’údaraigh an Chomhairle an Coimisiún le tús a chur le caibidlíocht i leith Comhaontuithe Comhpháirtíochta Eacnamaíche leis an nGrúpa Stát san Afraic, i Muir Chairib agus san Aigéan Ciúin².
- (2) Síníodh an Comhaontú Comhpháirtíochta Eatramhach idir an Comhphobal Eorpach, de pháirt, agus na Stáit san Aigéan Ciúin, den pháirt eile³ (an ‘Comhaontú Comhpháirtíochta Eatramhach’), lena mbunaítear creat do Chomhaontú Comhpháirtíochta Eacnamaíche, i Londain an 30 Iúil 2009. Tá an Comhaontú Comhpháirtíochta Eatramhach á chur i bhfeidhm go sealadach ag Nua- Ghuine Phapua agus Poblacht Fhidsí ó bhí an 20 Nollaig 2009 agus an 28 Iúil 2014 ann, faoi seach.
- (3) Leagtar síos le hAirteagal 80 den Chomhaontú na forálacha maidir le haontachas Oileánstát eile san Aigéan Ciúin. Dá réir sin, d’aontaigh Stát Neamhspleách Shamó agus Oileáin Sholomón don Chomhaontú agus tá sé á chur i bhfeidhm go sealadach acu ó bhí an 31 Nollaig 2018 agus an 17 Bealtaine 2020 ann, faoi seach.
- (4) Chuir Niue iarraidh ar aontachas in éineacht le tairiscint rochtana ar an margadh faoi bhráid an Aontais an 26 Bealtaine 2023.
- (5) Tá measúnú déanta ag an gCoimisiún ar thairiscint Niue agus measann sé go bhfuil sí inghlactha. Dá réir sin, thug an Coimisiún an chaibidlíocht le Niue i gcrích an 12 Meitheamh 2023.
- (6) I gcomhréir le hAirteagal 76(3) den Chomhaontú, tá an tAontas agus Niue chun an Comhaontú a chur chun feidhme go sealadach 10 lá tar éis dóibh fógra a thabhairt dá chéile i scríbhinn go bhfuil na nósanna imeachta is gá chun na críche sin curtha i gcrích.

¹ Thug Parlaimint na hEorpa a toiliú an [dáta].

² Treoracha ón gComhairle maidir le caibidlíocht i leith Comhaontuithe Comhpháirtíochta Eacnamaíche le tíortha agus réigiúin ACC (9930/02 (DG E II) HH/sg).

³ Cinneadh 2009/729/CE ón gComhairle an 13 Iúil 2009 maidir le siniú agus cur i bhfeidhm sealadach an Chomhaontaithe Comhpháirtíochta Eatramhaigh idir an Comhphobal Eorpach, de pháirt, agus na Stáit san Aigéan Ciúin, den pháirt eile (IO L 272, 16.10.2009, lch. 1).

- (7) Ba cheart aontachas Niue leis an gComhaontú Comhpháirtíochta Eatramhach a fhorpheas thar ceann an Aontais, faoi réir thaisceadh na hionstraime aontachais ag Niue de bhun Airteagal 80(2) de,

TAR ÉIS AN CINNEADH SEO A GHLACADH:

Airteagal 1

1. Déantar aontachas Niue leis an gComhaontú Comhpháirtíochta Eatramhach idir an Comhphobal Eorpach, de pháirt, agus na Stáit san Aigéan Ciúin, den pháirt eile (an ‘Comhaontú Comhpháirtíochta Eatramhach’), a fhorpheas leis seo thar ceann an Aontais, faoi réir thaisceadh na hionstraime aontachais ag Niue de bhun Airteagal 80(2) de.
2. Déanfaidh Uachtarán an Choimisiúin, thar ceann an Aontais, fógra a thabhairt do na Páirtithe Conarthacha eile sa Chomhaontú Comhpháirtíochta Eatramhach agus do Niue á rá go bhfuil aontachas Niue leis an gComhaontú Comhpháirtíochta Eatramhach formheasta ag an Aontas.
3. Tá téacs na tairisceana maidir le rochtain ar an margadh ó Niue i gceangal leis an gCinneadh seo.

Airteagal 2

1. D’fhonn an Comhaontú Comhpháirtíochta Eatramhach idir an tAontas agus Niue a chur i bhfeidhm go sealadach, tabharfaidh Uachtarán an Choimisiúin, thar ceann an Aontais, an fógra dá dtagraítear in Airteagal 76(3) den Chomhaontú Comhpháirtíochta Eatramhach.
2. Cuirfidh an tAontas agus Niue an Comhaontú Comhpháirtíochta Eatramhach i bhfeidhm go sealadach 10 lá tar éis dóibh fógra a thabhairt dá chéile i scríbhinn go bhfuil na nósanna imeachta is gá chun na críche sin curtha i gcrích acu i gcomhréir le mír 1.

Airteagal 3

Ní fhorléireofar formheas aontachas Niue leis an gComhaontú Comhpháirtíochta Eatramhach mar ní lena dtugtar cearta nó lena bhforchuirtear oibleagáidí is féidir a agairt go díreach os comhair chúirteanna nó bhinsí an Aontais nó na mBallstát.

Airteagal 4

Tiocfaidh an Cinneadh seo i bhfeidhm lá a ghlactha.

Arna dhéanamh sa Bhruiséil,

*Thar ceann na Comhairle
An tUachtarán*